

# Ilinniarnertuunngorniarfimmi angusimasanik ilinniarnermut allamut nuussisarneq allatullu atuartitsinermut peqataannginnissaq pillugu Namminersorlutik Oqartussat nalunaarutaat

Ilinniarnertuunngorniararneq pillugu Inatsisartut inatsisaanni nr. 13, 22. november 2011-meersumi § 40, imm. 5 naapertorlugu aalajangersarneqarpoq:

## *Nassuiaatit*

§ 1. Angusimasanik ilinniarnermut allamut nuussineq nalunaarummi matumani tassaatinneqarpoq ilinniartup ilinniarnertuunngorniarfimmi piffissap ilinniagaqarfusup ilinniartuuffiusullu ilaani peqataanngissinnaatitaanera. Angusimasanik ilinniarnermut allamut nuussinikkut soraarummeernermi misilitsisummut ataatsimut arlalinnulluunniit peqataanngitsoortoqarsinnaavoq.

§ 2. Atuartitsinermi angusimasanik ilinniarnermut allamut nuussisinaanissamut tunngavissiisumi pineqarpoq:

- 1) fagini ilinniarnertuunngorniarfimmi atuartitsiviusuni allanilu ilinniarnertuunngorniarfinni ilinniagassatut pilersaarutit pillugit Namminersorlutik Oqartussat nalunaarutaat naapertorlugu ingerlanneqartuni faginilu allani kalaallit danskilluunniit oqartussaasuinit ilinniarnertuunngorniarfinni qaffasissutsinut A, B-mut C-mulluunniit inissinneqarsimasuni atuartitsineq,
- 2) nunat avannarliit arlaannit Savalimmiuniillu aamma Ålandimit ilinniarnertuunngorniarfinni atuartitsineq, imaluunniit
- 3) fagini ingerlatanilu allani nr. 1-imi 2-milu taaneqartunit allaanerusuni atuartitsineq, tamatumani Ilinniartitaanermut Naalakkersuisoqarfik rektorimit tamatuminnga inassuteqartoqarneratigut suliatigut tunngaveqarluni taamatut aalajangiippat.

*Imm. 2.* Atuartitsineq pineqartoq ilinniarnertuunngorniarfinni qaffasissutsini A, B-mi C-miluunniit inissisimareersimangippat Ilinniartitaanermut Naalakkersuisoqarfik rektorimit tamanna pillugu inassuteqartoqarneratigut pisariaqartinneqarpat suliatigut tunngaveqarluni inissiisinnaavoq.

## *Angusimasanik ilinniarnermut allamut nuussisinaanissamut piumasaqaatit*

§ 3. Ilinniartuq fagimi ilikkagassatut anguniagaasunik tamakkiisumik ilaannakortumilluunniit naammassinniffiusumik suliatigut piginnaasaqalersimasoq rektori naliliippat qinnuteqartoqarneratigut

angusimasanik ilinniakkamut allamut nuussinissaq rektorimit akuerineqarsinnaavoq, tak. § 2.

*Imm. 2.* Angusanic ilinniakkamut allamut nuussinissamik qinnuteqarnermut tunngavissiisuusunik ingerlataqarsimanermut uppersaatinik pisariaqartinneqartunik, taakkununga ilanngullugit siusinnerusukkat atuartsinermit uppersaatinik atsiornernillu saqqummiussinissaq ilinniartup akisussaaffigaa.

**§ 4.** Angusimasanik ilinniarnermut allamut nuussisoqarsinnaavoq tamakkiisutut, ilaannakortumik imaluunniit taarsiissutitut nuussinertut.

*Imm. 2.* Faginut angusimasanik ilinniarnermut allamut nuussinissamik qinnuteqarnermi tunngavigneqartunut malittarisassat naapertorlugit ilinniartup fagimik pineqartup assinganik taamatulli, imaluunniit ilinniarnertuunngorniarni qaffasinnerusumik naammassinnissimaguni angusimasanik tamakkiisumik nuussinissamut akuerineqarsinnaatitaavoq, taamaattoorli tak. § 13, imm. 2.

*Imm. 3.* Ilinniartoq fagimi ilikkagassatut anguniakkanik tamakkiisumik ilaannakortumilluunniit naammassinnissimalluni suliatigut piginnaasaqalersimappat angusimasanik ilinniarnermut allamut ilaannakortumik nuussisoqarsinnaavoq.

*Imm. 4.* Taarsiissutitut angusimasanik ilinniakkamut allamut nuussisoqarsinnaavoq ilinniartoq fagimik allamik fagimilluunniit allatut taasamik taamatulli imaluunniit qaffasinnerusumik, ilinniakkami siunertamut tunngasuni fagimut peqataanngiffisassatut aqqinneqartumut taarsiunneqarsinnaasumik naammassinnissimappat. Angusimasanik faginut kalaallisut, danskisut, tuluttut matematikkimullu, kiisalu ilinniartitaanermi suliasamat taarsiissuteqarnikkut nuussisoqarsinnaanngilaq.

**§ 5.** Ilinniartunut ukiumik ilinniarfusumik kingullermik aallaqqaataaneerisunut ilinniartunullu ilinniakkamik qimatsinerup kingorna ilinniartitaanermut akuerineqartunut angusimasanik ilinniarnermut allamut nuussisinaanermik rektori killilersuisinnaavoq. Ilinniartup suliatigut pisariaqartitai aallaavigalugit ilinniarnermillu ingerlatseqqinnerup naapertuuttumik ataqatigiisumillu aqqissuunneqarnissaa aallaavigalugu killilersuineq aalajangersaavigineqassaaq.

*Angusanit ilinniarnermut allamut nuussinerup inatsisitigut sunniutai*

**§ 6.** Angusanic ilinniarnermut allamut tamakkiisumik nuussinerup ilinniartup fagimi ataatsimi atuartsinermik tamarmiusumik peqataannginnissaa fagimillu naammassinninnginnissaa nassatarissavaa.

**§ 7.** Angusimasanik ilinniarnermut allamut ilaannakortumik nuussinerup ilinniartup fagimi taassumaluunniit ilaani atuartsinermik tamarmiusumik peqataannginnissaa nassatarissavaa. Taamaakkaluartoq ilinniartup fagi naammassissavaa, tamanna pillugu malittarisassat naapertorlugit. Taamaattoorli fagimi piukkunnassutsimut inaarutaasumik karakteereqalernissamut tunngavissaanngitsunik angusimasanik ilinniarnermut allamut nuussisoqarpat ilinniartoq fagimi tamatigut misilitsittassaaq.

*Imm. 2.* Piffissanut soraarummeerfusussanut Naalakkersuisut aalajangersagaannut tunngatillugu tamanna ajornanngippat rektorip fagimi misilitsinnissaq siuartissinnaavaa.

**§ 8.** Taarsiissutitut angusimasanik ilinniarnermut allamut nuussinerup ilinniartup fagimi atuartsinermit tamarmiusumut fagimillu naammassinninnissamut peqataannginnissaa nassatarissavaa. Ilinniartup fagimik

pineqartumik qaffasinnerusumik nangitsinissamut periarfissai rektorip killilersorsinnaavaa.

§ 9. Piukkunnassutsimut karakteereqalerfiusumik fagimik naammassinninnissamut misilitsinnerusinnaasumullu peqataannginnissami ilinniartup fagimi taamatulli qaffasitsigisumik qaffasinnerusumilluunniit misilitsereersimanissaa allatulluunniit ilinniarnertuunngorniarmimmi fagimik naammassinnissimanissaa piumasaqaataavoq, tamanna pillugu malittarisassat naapertorlugit.

§ 10. Ilinniartut atuartitsinermut peqataanngiffiusussamik angusimasanik ilinniarnermut allamut nuussisimasut atuartitsinermut pineqartumut peqataasinnaatitaanngillat.

§ 11. Ilinniartut fagimi piukkunnassutsimut inaarutaasumik karakteereqalernissamut misilitsissinnaanermulluunniit peqataanngiffiusussamik angusimasanik ilinniarnermut allamut nuussisimasut ilinniakkap ilaatut fagimik aallaqqaataanit naammassinnissinnaanngillat.

§ 12. Ilinniartuq angusimasanik ilinniarnermut allamut nuussisimasuq ilinniarnertuunngorniarmimmit sivikinnerusumik faginilluunniit amerlanerusunik imalimmik immikkut ingerlataqarnissamik, aamma ilinniarniakkamik ilinniartup malitaanik rektorimit neqeroorfigineqarsinnaavoq.

§ 13. Angusimasanik ilinniarnermut allamut nuussiviusumik ingerlataqarnissaq aallaavittut nutaanngilisoorsinnaanngilaq.

*Imm. 2.* Ingerlatarli ukiut tallimat sinnerlugit qaangiutereernerini naammassineqarsimasuq nutaanngilisimanersuq rektorip aalajangiiffigisinnaavaa.

*Angusimasanik ilinniarnermut allamut nuussinissaq pillugu siumut neriorsuineq*

§ 14. Ilinniartunut ilinniarnertuunngorniarnermik ilaanik Danmarkimi nunaniluunniit allani ingerlatserusuttunut angusimasanik ilinniarnermut allamut nuussinissaq pillugu Ilinniartitaanermut Naalakkersuisoqarfik rektorimit tamanna pillugu inassuteqartoqarneratigut siumut neriorsuisinnaavoq.

*Imm. 2.* Siumut neriorsuisoqarneratigut ukioq ataaseq angullugu atuartitsinermut peqataanngitsoortoqarsinnaavoq piffissamilu pineqartumi fagimik ataatsimik arlalinnilluunniit naammassinninnissamut peqataanngitsoortoqarsinnaalluni.

§ 15. Angusimasanik ilinniarnermut allamut nuussinissamik siumut neriorsuisoqarnissaanik aalajangiisoqartinnagu Ilinniartitaanermut Naalakkersuisoqarfiup suliatigut tunngaveqarlutik Danmarkimi nunamiluunniit allami pilersaarutaasutut ilinniarnissaq, tassunga ilanngullugit fagit tulleriinneri, fagit qaffasissusia, ilikkagassatut anguniakkat ilinniartitaanermiluunniit Danmarkimi nunamiluunniit allami pisumi qitiusumik imarisaasut akuerissavaa.

§ 16. Ilinniartup piffissami fagimi ataatsimi arlalinniluunniit qarasaasiakkut atuartitsinermik naammassinninnissaa angusimasanik ilinniarnermut allamut nuussinissaq pillugu siumut neriorsuinissamik aalajangiiniarnermi piumasaqaatigineqarsinnaavoq.

§ 17. Angusimasani nuussinissamik siumut neriorsuineq pituttuisuuvooq, ilinniartup atuartsinerup angusimasani nuussinissaq pillugu siumut neriorsuinerup tunngaviusup ilaani pingaarutilimmi peqataangitsoorsimanera eqqaassanngikkaanni.

*Atuartsinerup allatut peqataanginneq*

§ 18. Ilinniartooq ilinniarnertuunngorniartimmut allamut ilinniakkamulluunniit allamut nuuppat sulianullu tunngasut pissutaallutik ilinniartup faginik toqqakkatut qaffasissusilinnik nangitsinissaa ajornarpat, rektorip ilinniartooq fagini piukkunnassutsimut karakteereqalerfiusuni misilitsiffiusinnaasunilu fagimi ataatsimi arlalinniluunniit atuartsinerup, kiisalu fagimik naammassinninnissamut peqataatinngissinnaavaa.

*Imm. 2.* Ilinniartup ilinniarnertuunngorniartimmut allamut ilinniakkamulluunniit allamut nuunna tunuliaqutaralugu peqataanginnissamut piumasaqaataavoq ilinniartup fagini allani atuartsinerup ilinniartup peqataangiffigisaanut naapertuuttumik annertussusilimmik qaffasissusilimillu atuartsinerup peqataasarnissaa naammassinninnissaalu.

§ 19. Ilinniartup fagimik pineqartumik atuartimmik allami ingerlatsillunilu naammassinninnissaa rektorip akuerisimappagu rektorip tamatumunnga peqatigitillugu ilinniartup fagimi atuartsinerup, kiisalu piukkunnassutsimut inaarutaasumik karakteerinnalluni fagimik naammassinninnissamut misilitsinnerusinnaasumullu peqataatinngissinnaavaa.

*Soraarummeersimanerup uppersaammik angusimasani ilinnarnerup allamut nuussisimanermik nalunaarneq*

§ 20. Ilinniartooq fagimik naammassinninnissamut peqataangissutaasumik angusimasaminik ilinnarnerup allamut nuussisimappat ilinniartup soraarummeersimanerup uppersaataani tamanna pillugu paasisitsisoqassaaq.

§ 21. Fagimi, angusimasani ilinnarnerup allamut nuussinissamut tunngavigineqartumi suliasami, casemi, imaluunniit oqaluttariarsornikkut allattariarsornikkulluunniit misilitsinnermi inaarutaasumik misilitsinnermi karakteerisinnaasat ilinniartup soraarummeersimanerup uppersaataanut nuunneqassapput misilitsinnermi karakteerit aamma fagimi pineqartut qaffasissusilimmi misilitsinnermi karakteerit.

§ 22. Piukkunnassutsimut inaarutaasumik karakteerit taamatulluunniit karakteerit ilinniartup fagimi angusimasani ilinnarnerup allamut nuussinerup tunngavigineqartumi inaarutaasumik piukkunnassutsimik naliliiviusut ilinniartup soraarummeersimanerup uppersaataanut nuunneqassapput, piukkunnassutsimut inaarutaasumik karakteerit aamma fagimi pineqartut qaffasissusilimmi piukkunnassutsimut inaarutaasumik karakteerit.

§ 23. Fagi angusimasani ilinnarnerup allamut nuussinerup tunngavigineqartoq, ilinniarnertuunngorniartuup pillugit malittarisassat naapertorlugit karakteerini ilinniartup

soraarummeersimanermut uppersaataanut nalunaarneqartussanut ilaqanngippat tamatumunnga taarsiullugu soraarummeersimanermut uppersaat karakterinik nuussivunngitsumik angusimasanik ilinniarnermut allamut nuussisoqarsimaneranik oqaaseqaatitalerneqassaaq.

**§ 24.** Fagi, angusimasanik ilinniarnermut allamut nuussinermut tunngavineqartoq ilinniarnertuunngorniartit pillugit malittarisassat naapertorlugit ilinniartup soraarummeersimanermut uppersaataani allanneqartussanit amerlanerusunik karaktereqarfiuppat tamatumunnga taarsiullugu soraarummeersimanermut uppersaatit karakterit fagimit angusimasanik ilinniarnermut allamut nuussinermut tunngavineqartumit pisut agguaqatigiissinneri allanneqassapput. Agguaqatigiissitat akunnaallisaasarneq pillugu nalinginnaasumik malittarisassat ilinniarnertuunngorniartinni naliliisarneq uppersaasiisarneq pillugit Namminersorlutik Oqartussat nalunaarutaanni aalajangersarneqartut naapertorlugit akunnaallisarneqassapput.

**§ 25.** Taarsiissuteqarnikkut angusimasanik ilinniarnermut allamut nuussisarneq pillugu malittarisassat naapertorlugit angusimasanik ilinniarnermut allamut nuussisoqarsimappat ilinniartup soraarummeersimanermut uppersaataa tamanna, kiisalu fagi angusimasanik ilinniarnermut allamut nuussinermut tunngaviusup aqqa pillugu oqaaseqaatitalerneqassaaq.

**§ 26.** Ilinniakkanit ingerlaqqiffusunit faginit karakterinik nuussisoqarsinnaanngilaq.

**§ 27.** Karakterit ECTS-skala aqutigalugu karakterinut ilinniarnertuunngorniartit pillugit malittarisassat naapertorlugit tunniunneqartartunut allannortinneqarsinnaappata aatsaat nunani allani ilinniarnertuunngorniartinnit karakterinik nuussisoqarsinnaavoq.

**§ 28.** Fagini angusimasanik ilinniarnermut allamut nuussissutaasinnaasuni misilitsinnerit misilitsinnerni ilinniarnertuunngorniartinni naliliisarneq pillugu malittarisassani piumasaqaataasuni amerlassutsinut taamaallaat atuutissapput ilinniartuq holdinut atuarfigisaminut misilitsissutissatut makitsinerup kingorna misilitsittussaasimagaluarpat.

#### *Naammagittaalliortarneq pillugu aalajangersakkat*

**§ 29.** Ilinniartuq imaluunniit ilinniartuq angajoqqaatut oqartussaaffigineqarpat, angajoqqaatut oqartussaasut nalunaarut manna naapertorlugu rektorip aalajangiinneranik, aalajangiinerup nalunaarutigineqarneranit sapaatit akunneri marluk qaangiutsinnagit Ilinniartitaanermut Naalakkersuisoqarfimmut inaarutaasumik aalajangiisussanut naammagittaalliuuteqarsinnaapput.

*Imm. 2.* Naammagittaalliuut tunngavilersorneqarsimassaaq.

*Imm. 3.* Naammagittaalliuut allaganngorlugu ilinniarnertuunngorniartuq rektorinut tunniunneqassaaq taassumalu nammineq suliamut oqaaseqaasiaani ilanngullugit Ilinniartitaanermut Naalakkersuisoqarfimmut ingerlateqqissavai. Suliap ingerlateqqinneqannginnerani ilinniarnertuunngorniartuq pisortaata naammagittaalliuuteqartoq oqaaseqaatigineqartumut oqaaseqarnissanut sapaatit akunneranik ataatsimik piffissalerlugu periarfississavaa.

Naammagittaalliuuteqartup oqaaseqaatigisinnaasai ilanngullugit Ilinniartitaanermut Naalakkersuisoqarfimmut nassiunneqassapput.

*Atuutilersitsineq*

**§ 30.** Nalunaarut atuutilissaaq 1. august 2022-mi.

*Stk. 2.* Tamanna ilutigalugu Ilinniarnertuunngorniarfimmi angusimasanik ilinniarnermut allamut nuussisarneq allatullu atuartitsinermut peqataannginnissaq pillugu Namminersorlutik Oqartussat nalunaarutaat nr. 7, 14. april 2015-imeersaq atorunnaarsinneqassaaq.

*Namminersorlutik Oqartussat, ulloq 5. juli 2022*

Peter Olsen

Ilinniartitaanermut, Kultureqarnermut, Timersornermut Ilageeqarnermullu Naalakkersuisoq

/ Karsten Peter Jensen

**Namminersorlutik Oqartussat**

Imaneq 4

3900 Nuuk

E-mail: [nsninatsit@nanoq.gl](mailto:nsninatsit@nanoq.gl)

Linkit iluaqutaasussat

Kalaallit Nunaanni inatsisinut nalunaarutit

Namminersorlutik Oqartussat inatsisinut toqqorsiviat

Naalakkersuisut

